

摘藻堂四庫全書薈要

集部

欽定四庫全書薈要

集部

盤洲文集卷

二十至
二十二

詳校官助教臣謝登雋



欽定四庫全書薈要卷一萬五千七百七十

集部

盤洲文集卷二十

宋 洪适 撰

外制二

徐嘉知紹興府制

里之內曰畿去天則通十國為連有帥作牧非輕弄

印踰時出綸示寵具官某襟懷夷粹問學精深再登表
著之班備見論思之益北兵入塞仗使節而敢前大郡
承流惠民編而不擾顧稽山之巨屏拱狩岳之行都事

簡而有常俗醇而易治為吾鎮撫賴汝慈祥當臨烹鮮之言靡須束溼之政往哉夙夜對以春秋

尹穡右諫議大夫制

予違汝弼古存五諫之名君明臣良斯振七人之職長茲言路尊我公朝具官某操絮冰霜識侔著蔡蚤陟小坡之列浸高橫榻之班殿上青蒲獲補闕拾遺之益人中屈軼擅觸邪指佞之聲以仁義而竭誠不沽激以干譽從容接畫慷慨憂時說必可行事皆有據積此臺端

之望峻其庭諍之權人主亦有逆鱗孰云難犯忠臣謂之骨骸無戒太剛益勉清操以伸正道

晁公武侍御史制

御史府風霜肅然遠近望而畏之南床最為雄劇非脩絜方聞之士寧刑印而不予也爾貫穿古今通達治體久勞于外事無不厯入朝三接滿歲九遷諫紙臺評飽聞鯁論憂時謀國具見公忠禁路乘驄孰曰不可善善惡惡益期盡言副我虛懷以休廣譽

叅知政事王之望贈三代曾祖遷太子少保制士有積善於身播德於鄉而國有爵祿不需於生前則天之報施必於其孫子具官某清塵美行肩于古人重義輕財息爭化訟州閭以無怨公稱之我家造邦穀城以進士起家自其孫某迨茲三葉贊我萬幾流澤燾後信可取必春宮三少用賁重泉靈爽未淪服此嘉數

曾祖母向氏始興郡夫人彤氏永嘉郡夫人制國家之制官登朝列則寵及其父母一二股肱之臣乃

得追榮於三世蓋德厚者流光德薄者流卑也某氏歸
於儒門允蹈女憲令儀令德詒燕聞孫陟乎泰階增貴
廟祀雕軒象服裂以名邦音徽不遐知有愍冊

祖右朝奉郎文太子少傅制

臧孫有後於魯管氏世祀於齊考於古而驗於今豐其
德則腆其報具官某抱道不展積行在躬居鄉高月旦
之評誨子有羸金之訓惟今碩輔乃爾孫枝爰推飾壤
之恩以慰顯親之志亞於儲傳篆此蜜章明靈如存益

昨其慶

祖母安人黃氏昌元郡夫人制

朕延登邦傑進穆政塗式資康濟之材以成調一之効
爰申閔典用侈大門某氏婉靚凝姿溫良賦德克謹蘋
蘩之薦率循珩珮之和教子始登于儒科有孫遂叅于
鈞軸積善之報垂榮無窮茲䟽象揅之恩以示松區之
寵光靈不昧尚克享之

父左朝散郎綱太子少師制

天下之為人親者必欲其後致君澤民以踐其詩禮之訓天下之為人子者必欲其身問安視膳以盡其菽水之驩仕而至於三階極為臣之榮可以伸重茵列鼎之養矣而白駒過隙風木興悲顧瞻在堂親不相待非國家優其顯報之澤則亦何以慰孝子之心乎具官某學耕文獲左右逢原破大邑之天荒拾儒科如地芥恬于勢利袖手下僚有子卓然材出儕輩贊我為政倚之中興副其追遠之思申以閔禔之冊宮師之亞班品甚崇

金方口人卷二十一
九原有知歆此無斁

母碩人張氏清河郡夫人制

朕臥薪嘗膽思報朔庭謀皆予同時有人傑登之政地
資以興邦宜申告第之恩以顯擇鄰之訓某氏母道慈
篤閨風靚專儷德名儒騰芬姻戚惟爾哲嗣作我大臣
嗟黃髮之不遐使萬鍾之弗洎祿之翟第賁及泉扃遺
懿猶生卹章是寵

妻令人張氏咸安郡夫人制

詩首二南鵲巢詠鴈鳩之德禮分六服鞠衣參禴翟之
華惟公侯有開國之尊故湯沐以從夫為貴某氏儀度
嫺雅性資惠明婉於儒宗有夙夜相成之益相其時祀
竭春秋匪解之誠壺則甚章嬪風可法既宜家而偕老
見得路以躋榮茲疏大郡之封以正小君之位其祗茂
渥益廣淑聲

考功郎中沈度直祕閣知平江府制

吳門介藩密接行闕異時持橐之臣乞左符而不可得

爾以名家典郡威而不猛刃遊肯綮庭無逋事題輿是
邦厥有遺愛輟自省戶寓直道山用增森戟之重凡惠
民戢吏聽訟理財之事不待丁寧之訓也惟枕江連海
戒于外虞監牧之政營屯之寄所以寬我民食者爾尚
勉之

何熙志御史臺檢法官制

朕寄耳目于御史府疇咨時望以長風憲又使其舉所
知備寮案所以叅論議廣聰明公是非也爾博物洽聞

莅官得譽御史以爾為蜀士之秀朕信之不疑俾爾接
武霜臺以俟簡拔非曰從事三尺法而已

沈清臣太學錄制

賢士之闕教法有掌譽非素著衆豈心服爾通經術嘗
厯校官宜居學職振我序音

起居舍人李南壽直秘閣宮觀制

士大夫足入中都則患得患失不知去朕甚病之爾學
問該洽嫻于文辭洊列周行滋有華問立螭簪筆其地

甚要典朕三禮行且為真雅意一丘銳然勇退瀛州寓
直休以叢祠益修器業以俟妙東

陳大年循文林郎制

戎事既興邦有賞典爾能以輯濯助我邊防增秩之榮
用以勸衆

李喆贈奉議郎制

爾齋恨泉下嘗有邱章鄉邑陷蕃不復告第王師闡土
有子自言復出絲綸尚其歆服

錢宗俊承信郎制

富者畱財一豪不拔爾能捐私積佐急公上登名右列
為爾之榮

歸正官張彥循儒林郎制

爾久淪羣鄉心在王室糾合義士分犁偽官幡然來歸
宜有褒賞益思策勵以答恩休

虞允文端明殿學士同簽書樞密院事制

文武之憲萬邦政豈分於二柄帷幄之籌千里象實並

於三階明良所其賡歌夙夜以之基命我有峻德諧于
僉言具官某挺昂霄聳壑之姿挹斂罟淬鋒之器前言
往行發為議論之英大冊高文兼得典謨之體昨當牛
渚之役獨勵戈舡之師一掃妖氛微管仲民其左衽再
開幕府用李勣賢於長城既邊瑣之周知殆戎弢之暗
合夕烽報警清蹕戒嚴惟本兵式賴于傑材則料敵無
逃于沈畫俾贊宥地共寧慶基噫齊有晏嬰遂獲折衝
之效漢得汲黯可寢發冢之謀益務交修勿令專美

錢端禮端明殿學士左通議大夫簽書樞密院
事兼提舉德壽宮制

天子守在四夷所貴禦戎之策公輔間於兩社均為執
政之臣厥任不輕非賢罔入具官某富淵源之學有夷
雅之風獻納論思久掌民曹之計發縱指示嘗額幕府
之權諭軍致鳧藻之和料敵若著龜之智言皆可復忠
在不欺朕德媿協華志期繼伐問安視膳欲伸天下之
歡分職設官當建宮中之使若稽祖武厯選臣隣乃籌

經武之英俾贊本兵之重庶仰司于慈禁仍外折於遐
衝賜以賢科循夫故事噫刷會稽之恥必以范蠡為師
寢淮南之謀是資汲黯之力益思長轡同穆丕機用酬
協贊之勲斯廣無窮之聞

魏勝贈節度使制

執干戈而衛社有保疆域之勲援枹鼓則忘身果狗死
綏之志特峻齋壇之賚用高盟府之書慰厥營魂渙茲
愍冊具官某心機英敏膽略驍雄慕中興銳將之名有

橫挑朔庭之志據邊城而歸義立漢幟以成功易子析骸能堅華元之壁鍛甲砥劍遂換山陽之符會敵國之窮兵出清關犯境中流斷絕大振蒙衝之威廣野交鋒獨賈發孤之勇期戎麾之電掃驚武帳之星沈嘉爾盡忠為之屢歎神旗豹尾更增廟食之榮羽林孤兒庸侈門資之澤諒其精爽歆此恩休

張全贈拱衛大夫防禦使杜斌贈拱衛大夫團練使李庠贈左武大夫團練使制

羽林拔距夙馳勇鷲之聲馬革裹尸共惜奇厖之逝爰
推卹典用尉營魂具官某材氣沈雄機謀超邁結髮殆
更於百戰治軍俱合於六殲名既冠於轅門勲浸書於
盟府欲執俘而釁鼓寧盡敵以死綏嘉爾孤忠為之屢歎
斷匈奴之臂莫遂壯圖歸先軫之元空懷偉烈用崇橫
品仍列遙防

杜斌李序
並作遙圍

尚其英靈知此愍飾

知漳州王晞亮祕閣修撰致仕制

年至遂老乃丈夫之常夜行不休亦古人所戒厥惟持

橐之彥豈復桂冠之拘爾抱器甚高策名茲久偃儒紳
而蹈景叅嶰律以含和再入京華遂騫禁密靖共爾位
嘗馳封駁之聲疇若予工備罄論思之益一麾去國五
袴宜民踵知止之高風上遺榮之需牘畀以論譔之職
諧其燕閒之懷家有安車斯示子孫之寵門施行馬不
妨故舊之游益荷美名以綏壽嘏

王逖右正言制

天子有爭臣所以使造膝盡規納君子無過之地中外

大小之臣有不飭其躬不稱其職者又得而糾之爾篤學有立論議據經守正朕得爾於占奏之間義冠霜臺名出人右茲用置爾於諫省爾其公是公非不吐剛茹柔以副朕耳目之寄

程叔達監察御史制

憲府有六察不獨檢柅吏姦所以助臺中之評伸天下之公也爾秉心端夷植學醇正題輿天府立政有聲勾稽柘寺清論所與陟之冠多茲號要津益思匪躬以俟

甄拔

曾逮浙西提點刑獄制

朕駐蹕吳中浙西八郡之民跬步可至帝城其銜冤負枉者皆能訴於臺省大則撾鼓投匭不難也部使者材稱其職則民欣然得其直矣爾學有元本紹其家聲甚秀而文達於從政曲臺考禮正藉洽聞祥刑擇官畀以使節非獨寬我憂民之心亦以遂爾奉親之志

王彥落龍神衛四廂都指揮使制

天子執賞罰之柄不可黨偏士卒變勇怯之心在乎激
勵儻逡巡而不進與逗撓者何殊闕論既誼薄懲難廢
具官某蚤推沈鷺遠有風聲由秦蜀萬里而來顧江淮
一面之寄所期李勣為我長城寧使齊人笑夫百步方
尅日俟濠梁之捷乃望風捨昭關而歸辟易如斯掃清
何賴庸按出師之律少伸退舍之誅屈此憲章鑄其廂
部噫探姑繒之壁當圖盡敵之功復鴈門之跡斯雪非
夫之恥永懷寬典勿負異知

劉寶落節度使制

將士之勇怯視賞罰於朝廷人主有勸懲采是非於公
論衆之所咎朕不可私具官某蚤謂沈雄起之閑廢專
揚楚一面之寄握貔虎六師之權所期固守於金湯可
以坐清于氛祲暨妖鋒之犯塞以鬪舸而出淮當守將
鏖戰之未分乃轅門陰拱而不動即以會兵為解輒爾
委城而歸分閫如斯防邊焉用庸按治軍之法少仲退
舍之誅用奪齋旄特寬禁罔噫徼蒲騷之役彼方逞於

凶殘復鴈門之騎汝尚追於賢範能圖盡敵之報可雪
非夫之羞勿負深知以崇永譽

惠迪國子博士制

博士秦官也非資稟淑茂道術通明者不足以居之爾
溫故知新可以為師矣晨入成均則詔諸生誨以正心
誠意之學豈止章句文藝云乎哉

吳芾徽猷閣直學士知臨安府制

京師蓋浩穰之地輦轂以彈壓為先威不振則盜賊公

行政之修則紀綱具舉必濟寬之有術斯救弊而無偏
我得賢能使之尹正具官某材見實用學非空言頃達
表著之班疊佩蕃宣之寄發擿隱伏雖銖兩之姦皆知
撫字困窮無尺寸之膚不愛復入文部一清武銓會天
府之闕人稽輿言而出命顧覆車之當戒期奠枕而相
安前有趙而後三王遺風可想昔無襦而今五袴惠露
是宜用副選掄益思幹治

薛良朋直顯謨閣浙西轉運副使制

宇內漕輓皆置使者惟畿部治於帝所有劇繁之事倉猝之須故選材非它道比今水潦之後民艱於食倉庾亦不豐其儲使者得人則可以寬中吳之慮以爾學遽識明長於吏道剖符持節有赫赫名乃輟之省闥任以計臺又寵之以謨訓之直雖爾以田廬姻婭為言吾不以小嫌而妨實用當體茲意勉旃毋忽

朱夏卿權戶部侍郎制

四鄙宿兵大農之費益耗六官服采版部之任最難惟

得其人而理財則不益賦而足用疇咨在列選擢匪輕
具官某稟資既良信道甚篤緣飾兼乎儒雅肯綮發乎
新硯入為司稼之卿嘗治供軍之政輸將二浙勞勩累
年便朝每納其面陳輿論咸稱其心計惟乃顯考和我
慈闈取日虞淵獨高忠烈紬書金匱具載勲庸有賢子
之克家見流風之燾後當茲多壘所貴實材超地官筆
索之班摠天下貨泉之柄勉圖振職休於前人

王稽中考功員外郎制

司績大夫掌仕者增秩之政吏或挾拾細故逞其私欲梗之毫釐失之千里以爾挺介特之操有剛嚴之聲乃自憲臺徙之郎位使在選者無沮抑滯留之歎則與明目張膽時無以異也

趙禹閤門祇候制

上閤之職右列所榮幕府以爾馭軍有律宜用旌賞勉思報國無媿恩章

魏郊武功大夫忠州刺史制

漢人取從軍死事之子孫養于羽林教以五兵號曰羽林孤兒有征伐之役則選用之汝父北征死敵忠勇無雙汝年雖未冠朕不惜高秩厚祿使汝襲乃父之品北敵者不戴天之讎也其思所以報之

唐堯封殿中侍御史制

天下之是非不公則有諫官御史寄一人之耳目以筆端挽黜陟之柄若聽之不聰視之不明則白黑弗分而玉石俱焚矣以爾學為醇儒行為莊士議論正直無所

黨偏主盟賢關士不踰矩宜執霜簡接武赤墀使僉壬
斂衽善良伸氣則朕有知人之哲而汝無負于風聞顧
不休哉

盤洲文集卷二十

欽定四庫全書薈要卷一萬五千七百七十一

集部

盤洲文集卷二十一

宋 洪适 撰

外制三

晁公武權戶部侍郎制

君子言必可行寧為一切之弊洪範食以為首孰明八
政之源時有通儒長于心計詳其說則若折枝之甚易
試以事則豈刻楮而無成往諧地官式蔽朕志具官某
學潛墳素材挺梗柟論思殫造膝之忠謇諤得匪躬之

故網紀正于轍下措紳畏其筆端自四鄙之多虞或一日而再召充牣憂時之略科條足國之方論及理財蓋纚纚而可聽使之治賦會綽綽而有餘與其專憲府而寄以抨彈孰若貳版曹而究其績用儻以責人而責已斯能為上而為民即問錢穀幾何可冀貫朽粟陳之効亦有仁義而已當無頭會箕歛之非用觀避募以聳輿望

王剛中禮部尚書兼給事中直學士院制

咨四岳能典朕禮孰為稽古之儒俾萬姓咸大王言必
賴綴文之傑仍居批勅之地斯極垂紳之榮具官某材
冠倫魁詞工體要西掖妙清泉之思坤維馳制閭之聲
論道下帷記甘盤之舊學因師獲印邁仲進之前塵召
對昕朝超登內職臨文問諱懼奸祖廟之名辭尊居卑
退就北門之直畀宗伯討論之事兼夕郎糾駁之權稽
首而遜夔龍昔光帝典拊髀而思頗牧今在禁林悉展
賢謨用裨國論

周葵資政殿學士提舉臨安府洞霄宮制

執政其猶股肱所藉弼諧之助大臣斯有體貌况無纖
介之嫌惟時碩儒厭叅萬務庸出釣休之命俾間知足
之風具官某躬上賢之資究先聖之壺青天白日人爭
睹其清明北斗泰山士咸高其景行見謂居今而行古
未嘗枉尺而直尋屢入脩門晚騰夷路間兩社而為輔
久穆丕機有一言以興邦每陳正道粵自亘垂之警浸
勤夙夜之憂秣馬治兵揆漢室備邊之策豐財積粟講

荀卿富國之篇正賴同寅用圖再造儵爾易退確乎不
移乃隆秘殿之班仍賜真祠之祿終始惟一身名俱榮
噫富貴而歸故鄉自守冰霜之操謀猷則告爾后尚無
金玉其音往企前英益迪華問

鄧王夫人錢氏廣國夫人制

朕以乾德始郊避新陽之近晦永熙故事改嗣歲之上
辛適值邊虞用循祖武雖蕃釐之未受顧慶澤之難稽
錢氏德邁前塵行光內則服禮義之訓飛周篇魯冊之

華生忠孝之家參宗子齊姜之盛儷我冢嗣驪于兩宮
茲推泰時之恩載裂番禺之壤彤管有煒既婦道之可
書翟茀以朝在皇儀而甚美其隆閨範以耀綸章

慶王夫人韋氏華國夫人制

朕初修郊類以戒先庚之期會有塞氛遂移建巳之月
迺歛泰元之福預推大胄之恩爰舉邦彛式光子舍韋
氏儀度嫺雅性資惠和誦周召之聲詩閨風夙講鍾姜
任之餘慶戚畹迺推惟踐履于女圖故章明于婦順昨

之成國易彼舊封佩箴悅而問雞鳴益隆孝道如山河
而宜象服克稱德容艷此華章昭於彤史

恭王夫人李氏定國夫人制

朕將燔郊燎偶警邊烽仰憲先猷嘗講上辛之卜參稽
古訓遂改長羸之初雖未逆于神釐爰預行于邦渙李
氏珩璜中節紛悅合儀出英衛之門聽姆教而婉婉歸
間平之邸成婦道之肅雍嬪嬙譽其淑聲娣如知其端
操茲徒封於望國猶拜況于泰壇象服是宜庸侈并加

之美彤管有煒浸揚竹帛之芬往荷華章益綏柔履

張宗卿祕書郎鄭升之正字制

往者大減冗員雖瀛洲學士亦損其大半茲有乏材之
嘆而議者歸咎儲蓄之不廣也閏月甲寅制書始復祖
宗之舊宜有望士褒然充庭爾宗卿五領之英冠于賢
級爾升之三衢之秀經為人師或別朱紫于麟臺或事
雌黃于蠹簡益思涵養以稱僉期

閻安中國子司業制

古之盛帝投戈而構藝息馬而論道今仍年出車邦賦
不足雖養士有費朕不敢惜蓋長育秀異以備他日之
用也爾材美于西州名高于鼎甲裁獬豸冠則羣而不
黨掌南宮牋奏則粲然有文訂五禮之制則是古而不
變非強學力行者能如是乎茲用陟之成均受以師說
必能使諸儒樂循理而有士君子之行也模不模範不
範抑無媿焉

楊似循從事郎制

邊鄙有興勇者當奮其力富者當輸其財而殲嗇成俗
體國之風無聞焉爾心不恤緯傾貲助軍增秩出綸夸
彼鄰曲

王宣防禦使制

朕志在勸功不棄出綸之信醲于用賞每懲剋印之非
具官某趨猛知名朴忠著節出奇設伏夙蘊深謀掩空
擊虛屢彰驍績茲分王旅遠戍邊垂杆襄陽之衝薦聞
吉語嚴樊城之備咸奮鬪心用陟兵防式光戎幙益思

吞敵以答恩章

任天錫左武大夫遙郡防禦使制

西師出塞咸有戰多莫府上功式稽信賞具官某衆推
勁勇自奮忠純執銳披堅久居行陣斬首捕敵能立勲
庸用陟遙防仍陞優品勉圖報効嗣有恩光

陳偉節直秘閣制

朕聘召元老尊彊朝廷優禮殊恩實循舊典爾大丞相
之冢子也一經之訓不墜家聲寓直瀛洲用作過庭之

寵

陳巖肖禮部員外郎制

太上皇帝取祖宗詞學之科新其名更其制始許公卿大夫之世與登進士第者角其藝而選之爾褻然為任子倡坎壈不振人咸歎焉再入郎闈處非其地南宮掌翰僉曰汝宜往脩厥官以陟華近

程宏遠大常博士制

奉常有博士所以議國家之禮定公卿之謚名鬼神之

祠也爾學耕文獲馳譽校官曲臺者暖秀之地往遊其間可不勉哉

王剛中轉朝散大夫制

有司嚴考課之法積四載而應條從臣獲異等之恩損一年而增秩合堯舜之陟典皆祖宗之茂規具官某以經綸之學而審是乎義農以雅健之文而用休乎燕許再光禁路即長春官青瑣黃扉所冀回天之力白麻丹詔可期擲地之聲茲諏律以進階匪諧曹而齋閤雖媿

尊賢之道實存厲世之公往服寵榮益崇聞望

郭振捧日天武四廂都指揮使制

結難肆凶焰以方張莫府推堅喜捷音之為倡可
無褒典用賁中權具官某識貫戎歿名高勇爵撫鳴劍
而抵掌久抱壯圖援枹鼓則忘身獨潛忠槩茲率千廬
之衛往屯六合之城會廣野之結蟠涉長淮而侵軼惟
時爪士首奏膚公鶴唳風聲已振干城之氣席卷霆奮
遂增貔虎之威式表轅門之勲俾冠廂部之職佇期掃

蕩嗣有龍光

崔臯正任觀察使制

朔庭入塞方議益兵莫府論功首聞禽敵宜頒褒渥以
寵戰多具官某自負鷙強咸推臯俊陳師鞠旅久厲節
於轅門折馘執俘屢書名于露版茲出千廬之衛往屯
六合之城會廣野之結蟠涉長淮而侵軼惟時名將獨
奮精忠冒白刃以前驅揮公矛而鏖鬪果能陷陣致彼
退師已標勇爵之勲特峻庶車之賞益思報効嗣有恩

光

唐閱司封員外郎制

冢卿之屬其司七間者併省司勳故主爵兼兩曹之事
用得其材則吏無並緣之姦人無稽滯之歎爾行安節
和恬于榮進為郎則未久也躋之前列合乎公言往殫
厥心以振其職

知天台縣王琰轉官再任制

天台之民件汝治行願復借留三年守臣考其實以聞

吾何愛一官而不徇斯民之請也益思盡力以望卓魯
蔣芾起居郎制

國家之用人如工師之用材可楹者不可使為桷可榱
者不可使為椳人物之英絕類離倫則一日九遷人不
議其速錄錄無庸或十年不調人不歎其滯若是則選
授公而衆職修矣爾以文藝登乎甲科以材器久于省
戶國人皆曰爾有荀楊之學有屈宋之文當在華近吾
方陟爾曲臺寘爾詞掖而訓詞猶未出也左螭虛位非

爾其誰宜為往欽哉以稱吾超拜之意

張進董江遥郡刺史制

熊羆之士不二心之臣立斬將艾旗之功則信賞之行
蓋不旋日某有履鋒之勇有徇國之忠茨湖之役涉水
力戰執訊獲醜咸奔于率書之盟府陟以州璽益思捐
軀用答恩涯

沈介起復權兵部尚書湖北京西制置使制

屬大事而當一面有鈇鉞之可專見素冠之能三年惟

金革則無辟蓋君子知斷恩之義在先王存變禮之文
我求寶臣起之由次某學廣而足用材高而不羣四禁
代言得上規姚姒之體三銓分職繼前有馬裴之稱治
行著於吳門威靈聳於蜀道事靡不舉人莫能欺適茲
疆場之虞正講甲兵之問顧荆襄之重鎮連江漢之上
游羽扇綸巾賴周瑜之制勝輕裘緩帶謀羊祜以折衝
奪其陟屺之哀授以防邊之筭用尊莫府俾長夏官總
光黃湓浦之封是為新制集步騎舟師之衆咸稟中權

寵使範以光前期戎翰之善後益攄壯略庸釋遠懷

呂廣問數文閣待制在京宮觀兼待講制

朕仰希堯舜三代之風樂聞詩書六經之說厥今帝幙
盡虛講讀之員既得耆儒首寘咨詢之列具官某言有
壇宇性守宮庭能習是而勝非故閤中而肆外董狐古
之良史嘗立赤墀伯夷汝作秩宗遂窺紫閣懷章而去
趨節復來陟西清次對之班修金華絕出之業國之治
亂與臧否惟前言往行之師學有緝熙于光明賴博物

洽聞之益往祇茂渥益振榮名

莫延甚銀青光祿大夫檢校太子賓客使持節
南丹州諸軍事南丹州刺史兼御史大夫知南
丹州公事武騎尉制

率土之濱莫非王臣靡私涵覆九州之外謂之蕃國所
貴懷來眷惟卉服之英能慕華風之美承祧有慶錫壤
為榮某浴義浸仁資忠履信心傾葵霍遠輸就日之誠
世受絲綸不闕梯山之貢既處天倫之長宜稱海嶠之

雄當茲似續之初賁以便蕃之渥躋銀艾祿臣之秩魚
風霜憲府之官擬儲邸之元寮陟勲階之華品併斯徽
數為我遐藩噫尊君之道無他主乎恭順撫俗之方有
要務在溫慈祇服訓言益綏福嘏

何備權工部侍郎制

朕履位以來勞人是戒苑囿服御無所益敢興土木之
謀技巧工匠精其能獨治甲兵之器久虛起部茲得勝
流具官某智畧湊于朕前言語妙于天下人瑞有鄭仁

表久侍左坳古事問高仲舒兼司右掖王邸賴談經之
益中臺分典選之權力陳宰路之有連願勾他官而遂
去顧博延于耆舊方自外來難近舍于文儒從其遠引
惟冬卿之非劇雖姻黨而無嫌茲用出綸俾之持橐其
廣立朝之譽益殫致主之忠

王稽中起居舍人制

左右史分主柱下班列甚清直造榻前謀猷可告言動
資其良筆選用在于端人爾古訓積于中而正論發于

外不憚大吏風采凜然自臺察而陟望郎繇郎闈而攝
記注再盈旬耳即真之命僉曰允哉益思盡瘁以報知
獎

盤洲文集卷二十一

欽定四庫全書薈要卷一萬五千七百七十二

集部

盤洲文集卷二十二

宋 洪适 撰

外制四

皇后封贈三代

曾祖吉水簿夏令吉太保制

士有戴仁而行抱義而處其道可以致君其材可以興
事而官不過八品職不過黃綬儲休衍慶在其後人三
葉之孫遂母天下則寵綏先廟不一褒而已也具官某

行修於身名播于外恬于榮進漫仕下僚積盛德而流光致柔儀之鼎貴愍書甚寵已躋亞保之班郊需先行庸正三公之冊營魂不昧勿替引之

曾祖母張氏衛國夫人制

國家廣顯親之孝崇告第之澤外庭之宰輔內掖之妃嬪皆得追榮其三世矧敵體紫宸齊明義曜者哉某氏懋徽榮之則秉幽靜之儀德配芳圖克恭蘋澗福流來裔爰正椒塗茲推泰時之恩大開淇奧之壤褫以象服

疊于幽局

祖穀太傅制

朕登建坤儀助宣王化內有進賢之志歌周南卷耳之
章外無出閭之言矯漢代長秋之敝推慶源之所自酌
愍冊而可行具官某令德藹乎州閭遠識該乎今古有
撥煩理劇之材而不得其位有愛人利物之志而獨善
其身集之慈孫儷乎皇極式衍曾沙之祉孰為幽窆之
光出帝傳之卹章寵廟祧之時享尚其歆服益右後昆

祖母孫氏蔡國夫人制

朕稽二祖之聖謨變一陽之元祀蓋乾德嘗避于近晦
淳化始行于上辛茲邊鄙之有興謀著龜而改卜雖神
釐之未受豈邦渙之可留某氏性婉而明教賢以肅四
德章于女憲六嫔講其壺彛婦道顯融罔專鍾郝之美
孫枝盛大遂成陰馬之家申刻蜜之新封表含飴之積
慶其以蔡仲之國用光夏氏之阡

父協太師制

和熹鍾鄧氏之慶不及護羌之存竇后登漢掖之尊已
結觀津之恨茲值邊疆之事未行郊時之儀預出恩章
敢遺戚畹具官某躬履五常之行氣備四時之和抱材
不享于脩年委祉遂綿於後嗣爰有息女以升中宮詠
任姒興周之詩監於彤史法春秋褒紀之義褻以師垣
精爽如存寵光無斁

母趙氏福國夫人制

孔子叙詩以后妃居三百五篇之首塗山娥嫫姜原任

如所以助三代之興也今朕得淑哲以隆內治則母氏之訓可忘乎某氏莊靚凝姿徽柔繕性出自公族分玉派之餘輝嬪于德人協鳳鳴之吉兆篤生良女遂履純坤永懷邾下之慈孰慰宮中之念講陽陔之慶典開長樂之脂田尚其重泉歆此褒禎

張綬潘景珪賈選大理評事制

廷尉平斷天下之獄而員少事叢慮清讞之稽逗也益者三人庶無曠職爾等明習律令秋卿以為言往充其

官思踵平廷之美

唐仲友祕書省正字制

劉晏言天下之文惟朋字未正朕既擢爾父于風霜之
地破黨與之私矣爾兄弟鼎立白眉最良發策玉堂奏
篇甚善宜居中秘讐校羣書歸休從容必無異同之論
王時升權兵部侍郎制

朕招延俊乂列布禁途庶幾獻納論思得厭難折衝之
畧咨諏謀度聞安民和衆之言顧武部之闕人稽僉諧

而出命具官某秉中庸之德著朴茂之稱版部幹旋合
研桑之心計輔藩撫字踵襲召之遺風節費用而府有
餘財勤簿領而庭無逋事未奏會稽之最已勞宣室之
思聚天下之兵朕方修于戎政率夏官之屬爾其治于
軍防式竚良圖用裨上策無使立朝之譽減於作郡之
時

翟貴妃封贈三代

曾祖世俊太子少保制

國家廣追遠之孝崇告第之恩外則三公上及其曾門
內則四妃可覃于初室寵光之渥存沒俱榮某翟方進
之孫班婕妤之祖雍容孝弟之行佩服詩書之言既抱
器之甚良乃埋光而不耀慶鍾來葉儀次中闈茲逢郊
類之期先漏泉扃之澤惟春宮之亞保蓋朝路之巍班
尚其營魂知此愍冊

曾祖母孫氏齊安郡夫人制

朕郊柴已具邊祲是虞稽皇祖之舊章卜長羸之首月

預行慶典、敢後外姻某氏溫靚呈姿、柔明宅志、佩帨奉
荏蘭之獻、錡管絜蘋藻之羞、盛德所延、後人鼎貴、繇八
月良家之選、冠四星天極之躔、茲以顯親之恩、得推飾
壤之澤、綖之象服、錫以脂封、迺其有知、尚克嘉此

祖思成太子少傅制

朕敷求邦媛、光贊坤儀、夙有淑聲、繼樊衛二姬之行、內
無私謁、非許史三王之家、推厥慶源、賁之卹冊、某評高
月旦、節挺歲寒、以利物而存心、不逢辰而諾仕、宜篤孫

枝之祐遂登妃掖之尊茲有蜜章用光先廟亞于儲傳
襚彼泉途想其如存服之無斁

祖母張氏和義郡夫人制

朕初虔郊類已戒先庚之期會有塞氛遂移建巳之月
雖神釐之未逆顧邦渙之難稽某氏毓粹名門儷德君
子柔則齊于鍾郝美聲協于姬姜慶綿再葉之英位冠
四妃之上于治于汴生能絜于蘋蘩如山如河沒遂滌
於暈翟光靈不昧永庇後人

父益太子少師制

天官書中宮天極其句四星大者為正妃餘則後宮之屬也王者求河雎之德卷耳之志者使之宣嬪則而應乾象於是有漏泉之澤及其三世之廟顧於顯考不厚可乎某秉青萍之器挺梗栴之材袖手林泉不得其位篤生淑女遂亞柔坤以孝敬而事慈闈以謙約而諧椒屋六寢之間靡人不稱其以官師之冊遜於幽隴以展其報親之心嗚呼休哉

母劉氏咸寧郡夫人制

聖善之愛其女以圖史之戒絲枲箴紵之事諄諄焉誨之於鄰下既齒又笄矣迺見其入禁掖登元妃光大門閭艷於戚畹今也服澣濯之衣以六珈副笄歸而壽其親不亦榮乎某氏其儀莊靚其德懿柔祀其先盡執遵之敬事其夫得舉案之恭有女甚賢藹然內範報厥母訓洊出恩章茲裂宜川之疆式開湯沐之邑門楣之語驗于是矣

吳蓋妻趙氏越國夫人制

朕將燔郊燎偶警邊烽祖武可遵嘗講上辛之卜神心
斯答宜改長羸之初雖未逆于龐禡爰預行於慶典某
氏儀容莊靚德履肅雍母訓少成循八篇列女之戒壺
彛交播為四姓小侯之師頻繁絜承嘗之羞滌瀦謹尊
章之禮如賓有敬偕老則榮茲崇鸞誥之封益示魚軒
之寵越為大國宜爾室家

王述直祕閣宮觀制

冊府上應東壁之躔吾七畧羣書充牣棟宇寓其直則
與挾卷拂蟬之士等非索歲月巧宦遊者可得也爾明
經博古嫻于文辭一再超遷駸駸顯列真之郎位弗安
厥居予之郡符旬閒愈力以其嘗入諫坡故貽以美職
遂其歸心蓋吾於言事之臣常委曲其恩意如此

李若川權刑部侍郎都督府參贊軍事制

朕慕孝宣綜核之政推帝舜好生之心念畫地為牢每
虞其輕入故吞舟之網寧失於不經眷求時論之英俾

作秋官之貳某性資閎敏談辯縱橫沛然理劇之材輔
以傳家之學久徊翔于外服甫軒翥于近班治賦版曹
弗寵天下之貨贊籌督府能寢淮南之謀身雖在于戎
亭位不虛於禁橐解嚴可冀踐職有期五行之屬三千
在成康而能厯一歲之獄數萬惟于張而不寃致吾空
國之隆賴汝立朝之效

張運知廣州制

二廣之區五羊最大藥洲蒲澗民有嬉遨之風龍戶馬

人政以撫綏為上得此良翰起之叢祠具官某蘊盤錯之材去表襮之飾法家讞獄解密網之秋荼禁路理財腐大倉之紅粟把麾而去歌袴可嘉念南服甚遠于朝廷故連率每艱其印綬儻風移俗易令孚黃木之濟則水宿山行害去綠林之盜往副朕指孟殫厥心

陳正同贈四官制

朕禮優法從恩篤臣鄰晚節挂冠已徇歸田之請一朝易簣采興移壑之嗟爰有卹章告其居第具官某風概

方整機猷碩膚蚤騰譽于峻岐遂致身于榮路貳秋卿
之禁橐知勝殘去殺之仁承天旨于籌帷有排難解紛
之助把麾而去歌袴甚休忽驚垂盡之言空軫云亡之
悼增之四秩飾彼九京沒而有知歆此無斁

潘景直祕閣致仕制

大夫七十而請老古之制也近人耽祿迺鐘鳴漏盡而
不知止吁可嘆哉具官某學道洗心聲中其實蚤入京
都垂上華轍晟府典樂祿臣司光皆當時之遴選退休

林壑亦既有年遺榮抽簪無玷終始中祕之直非賢弗
居光爾桑榆用迎壽嘏

李璿常仲循資制

爾淪胥異域久厭邊塵挺然來歸亦著功效進秩有命
夸組和門益思盡忠用答天渙

僉書樞密院錢端禮封贈三代

曾祖暄秦國公制

錢氏有德于吳越之民上天祐之宋興二百年間枝胄

蕃衍重龜襲紫為搢紳望族運籌帷幄祖孫相繼發祥
錫羨厥有自來具官某得傳家之學蘊邁俗之材入聯
禁途分司會之劇職出顯方面暢榮遠之英規搢紳高
其令名史策紀其遺懿惟厥顯考光輔兩朝迄今三葉
復登宥地天之報施可驗不誣大師維垣已崇懿典四
塞之國載錫蜜章是為有後之光益篤無窮之祉

祖駙馬都尉景臻大寧郡王制

宋有天下凡將相之子勲貴之家以選而為副車者無

慮數十百人雖公主將鉞生極其榮而甲第綺襦代襲
豪侈求其來裔卓爾不羣秉樞翊政光于三階者未之
有也具官某永昭陵之禁裔異姓王之間孫謙畏慈仁
白圭無玷享沁園之奉而有聲于戚畹傳金籙之學而
善訓其後人宜有孫枝致身兩地世德之懿瞻前無鄰
爵秩既尊疊祿泉壤燾以新社隰為樂郊尚其如存服
我休命

父忱慶國公制

昂霄之木不生於培塿之丘縱壑之魚不出于蹄涔之
水公侯之子孫踵前人之盛烈受高門之美蔭奮然有
立為國光輝者所憑厚也具官某天姬之嗣休有德名
樂善履謙白首不變教忠之訓咸仰義方陟我幾廷實
爾賢息延登之始飾祿有常表其流光昨國于慶式增
廟祔之寵且慰丕嘗之思

妻高氏和政郡夫人制

劉向採取詩書所載賢妃烈婦興國顯家可法則者為

列女傳後之秉直筆者莫不紬彤管之書序鵲巢之德
以足一代之史蓋婦人不出房閨美聞于姻黨則名達
於州閭至於垂之竹帛自微以至著非一朝一夕之力
也某氏桃姿蘭行華閨之英雖有姬姜孰佐君子至于
掌樞翬翟之封以榮鸞誥岷峨之壤載啓脂田享其偕
老之榮益修內助之德

左僕射陳康伯祖居仁越國公制

朕霖雨之思賢佐復正台衡舟楫之濟巨川遂彊國勢

敵國變發蒙之語邊氓諧咽哺之歡式衍慶源用覃先
廟具官某仁義根於心術孝友得之天姿懷利器而不
施彰華纓而漫仕惟邦之桀實爾之孫祗以維垣厥封
康叔之國賁之新冊大開勾踐之疆音徽不遐尚克嘉
此

范成大祕書省正字制

瀛洲英俊之躔也中興以來未有父子踵相躡者爾學
贍而文縟趾美于前人益觀異書以正魚魯之謬

吳總右朝奉大夫制

西師出塞日闢故疆中禁疏恩用酬茂績爾頃居莫府
辦治文書靡盬夙宵軍行有賴第勞增秩少示寵光益
思竭忠以濟勲閔

邵及之福建運判制

分道置使民之休戚係焉自昔用人或私其黨朕比下
令必對於文陛然後命之蓋敷奏以言明試以功之意
以爾吏能可取治郡有聲予節閩川廷無異論故使汝

便道奏事而絲綸不憚於先出也戢吏惠民轉輸不絕
俾七郡無不革之弊乃稱澄清之職

鞏衍大理正制

朕慮法吏吹毛不循三尺棘寺之屬詳于用人爾決讞
之久以文毋害其聽獄成思繼平反之美

戶部侍郎朱夏卿父勝非魯國公制

魯人類帝用駢剛于上辛漢代祀天歌朱明之雅樂朕
稽前王之成憲遵列祖之舊章偶四鄙之多虞變一陽

之大禮先斂中壇之福廣為幽窆之光具官某名聞華
夷功在社稷再安國步扶日轂于天衢具赫民瞻應星
符于台路有嗣賢之分鼎貳禁密而筭鞭慰其陟岵之
思出此漏泉之澤不改師垣之襃大開闕里之封尚其
英靈歆此愍飾

兵部尚書沈介故母莫氏贈碩人制

人子有吹棘之難創鉅痛深跬步不忘哀感惟金革之
事起之于服舍則先王許其變禮蓋移孝作忠不以家


事辭王事也某氏四德兼全六嫔所則相其夫猶樂羊之室仁其子得鳴鳩之風茲因邊鄙之虞奪爾執喪之嗣郊丘有需少塞沉憂音徽不遐知有卹冊

又所生母阮氏贈碩人制

漢文帝以黃龍見成紀始下詔議郊祀禮官曰古者天子夏親祀上帝於郊迺以四月幸雍祠五時今朕以邊事展期蓋亦有合于古也某氏其性婉淑其儀莊靚迺生令子為時顯人入從出藩已盡立身之美冬溫夏清

莫酬養志之誠式慰孝思用推愍典母慈如在尚克享之

盤洲文集卷二十二



總校官進士臣胡榮

校對官編修臣楊壽楠

謄錄監生臣王錡

欽定四庫全書叢要

集部

盤洲文集卷二十

三五

詳校官助教臣謝登雋



欽定四庫全書薈要卷一萬五千七百七十三

集部

盤洲文集卷二十三

宋 洪适 撰

外制五

王之望端明殿學士提舉江州太平興國宮制



朕圖回治道招顯時髦縱壑相須聚精神於左右墜淵

為戒全進退於始終錫此明綸賁於近輔具官某降材
足用抱器不羣茹古涵今明於先王之術本仁祖義列
於君子之林蚤列通階屢分劇職名節遠來於巴蜀戎

旃持摠於江淮言兵體之三章自許興邦之策堅帝意以十事載嘉尊主之忠迺繇諫坡遂躡政地冀素懷之底績能剋任而有為命其復往視師濶焉久不聞問國人皆曰可去謂尚出於私心臺評以汝為傾殆勿容於公議念股肱之舊弼推體貌之優恩畀以真祠班之秘殿俾遂燕閒之志當無喜愠之容噫孔子失之宰予蓋知人之不易成湯至于帝乙何謀國之皆賢其服寵光尚思報塞

敷文閣待制朱翌左朝議大夫制

三年而計羣吏若稽陟典之文系目不離小官獨減從
臣之考茲協銓曹之格實彰名器之公具官某學問淹
該詞章典瞻右坳書事馬遷有良史之材西掖出綸蕓
頽為代言之最論思皆本仁義吐茹不以剛柔厄彼讒
波久於災嶠晚逢更化連命承流撫字不諱其勞循良
無媿於古雖奉祠而養氣益遷秩之應條其服明綸以
暢榮問

韓彥古太府寺丞制

吾以北鄙有釁命爾祖先世之部曲以圖上其方略爾奮然願行無避難之色歸奏便殿雍容可觀顧雖攝事郎闥而雉監猶須汝也司府之屬俾復其舊往踐厥官則朝有著矣

江淮都督楊存中父震秦國公制

古語云三代之將道家所忌儻世濟忠義則福祿鼎來遠而有耀矣道家之忌豈其然乎具官某歿畧傳家盡

力邊圉父子死敵名藏金匱天之報施乃在嗣賢久典
戟衛受知兩朝以槐衮齋旄而賜真王之履以碧幢黃
鉞而顯督府之威茲遇郊釐益光禰廟咸秦之國載徹
舊疆英爽不亡尚克嘉此

王天覺循資制

兵出西方人百其勇第功行賞小大不遺爾名在轅門
戰功有績進秩一等用示恩榮

王師心知湖州制

朕巡守三吳以咎雪為藩輔疇咨九牧欲召杜之人材
得此良翰諧於僉屬具官某望實高嶷材猷碩膚再登
獻納之班獨抗忠嘉之論孟容還制多士想聞其風山
濤執銓人物各為之目郡章再綰師節五移拔薤本以
抑強嚴霜可畏憩棠陰而聽訟白日顯行凡牧人御衆
之方無撓植索塗之患茲選吳興之守孰踰禁密之英
賴善政有以撫綏則斯民不復愁嘆往振其職永孚於
休

虞允文父祺太子太師制

蜀道文儒之林也在西漢時嚴馬淵雲稟靈江漢擅聲
四海後來仰之如慶雲景星曾未聞父子繼美及致身
鼎輔者我宋勃興異材間出高視前古世載其英具官
某包括羣書洋溢嘉聞登名月窟仕不隆振儲休子舍
大其門閭光踐鴻樞兼握政柄聚精會神景行夔高宮
師褒褻制墨未乾茲講神釐復申卹冊以彰教忠之訓
以慰顯親之心沒有知也尚榮享之

周時夔路運判制

蜀道去朝廷幾萬里更有僞言郵御史風聞所不及民有
冤枉不能踐理匭及臺省之庭與我仁民而戢吏者其
唯賢部刺史乎爾文史足用稱有吏能蜀人也又嘗治
蜀之郡習於蜀之故也握此漕節是必振其職矣

張子蓋妻封國夫人制

朕考功伐而思虎臣既褒其祿又擢其孤猶以為未也
顧其平生忠義不以家為者皆伉儷之賢有以相貳之

某氏端肅之行柔明之性稱於宗黨宜其閨門子蓋扞
馬邊城嬰疾不壽使爾有未亡之嘆而感伊威之詩也
茲廣貽封昨以成國庶幾乎石窀之意

薛良朋知臨安府制

尹京之任亦難矣趙張三王擅名于漢後世猶議其明
者傷於太察嚴者傷於太猛鮮克有終殆以是乎國家
之都上京也尹正者皆輔弼之儲其望崇其權重可以
不憚大吏可以不避彊禦懷私者不得而撓之依勢者

不得而搖之故其威易立其政易成今暫蹕吳中名同而實異責重而勢輕故居之者為尤難爾整煩撥劇裕而不迫接物處事和而有立使節州麾名震中外靡人不以爾為材也疇咨四岳擢爾天府當官而行思善其後

趙渙江東運副制

都城之外其權重者無出於部刺史百吏之升絀一道之戚休係焉寬則人無所憚蔽則萬事不理猛則澤不

下流傲則情不上達傳不云乎過猶不及二者之失等耳爾材而甚健人謂素剛屢乘使輶亦既白首今予命汝持江左之節平其心守其局則汝之職舉矣

吳芾吏部侍郎制

朕疇咨輿誦品覈實能與其彈壓都城勞以謀訴倥偬之事豈若澄清選部振其銓總公平之休弊必務於盡除任弗嫌于數易具官某識邃以敏材周而通再入中臺乃率秋官之屬暨居東省嘗分夕拜之權擇良牧以

尹京輟貳卿于司列甫踰月律已播治聲雖稱職可嘉
在前孰出其右然審官既闕至今未得其人妙簡周行
俾尋故步夫鏡明則塵垢不止衡舉則輕重罔遺惟吏
姦有鈐制之方則仕進免滯淹之歎益行已試之效用
廣無窮之稱

黃鈞國子正闕者孫國子錄制

朕懲省官之非廣翹材之路博士員咸復其舊輔臣謂
爾通經術善屬文西州之英也召對可采列之學職勉

帥以正無負推擇

周用之循資制

朕以慈闈有天地之德顧無以報之日者奉寶冊尊徽
稱辨治之吏序勞進秩爾其一也祇此恩渙思稱所蒙
鍾世明復直徽猷閣知廬州制

合肥重鎮也新遭兵革之難民失其居朕誦鴻鴈之詩
謀方伯之寄命從臣御史之公選可勝任者爾翔歷中
外久有能名薦牘鼎來僉言無間茲甫起爾謹域畀爾

帥節還爾美職爾其以誠報國以仁撫民以智守邊以材集事使歸者輻輳閭里熙熙田疇日闢則諸大夫無失舉之責矣

汪澈端明殿學士知建康府制

十國為連莫重高牙之寄兩都相望實兼留鑰之雄爰出華章式崇舊弼具官某量包山藪識並著龜有貫穿今古之學而尊其所聞有酬酢事物之材而見於歷試忠臣謂之骨鯁獨振臺綱執政其猶股肱嘗參國論制

荆襄之專閫息疆場之外虞久憩叢祠甚淹遠業茲聽
輿人之誦俾還秘殿之班護我日畿鎮夫天塹惟虎踞
龍盤之壤莫府既尊則鷄鳴狗盜之姦非謀自寢往圖
綏撫用副倚毗

姜詵兩浙運判制

王畿千里外臺耳目之選非它道比也以爾久于宦路
綽有能名揭節閩川及瓜而代畿漕闕員肆以命汝惟
明則能察吏姦惟公則能革衆枉惟勤則能辦王事毋

徇私以干譽母媚上以害民十目所視可不勉哉

倪偁太常寺主簿制

簿領雖卑奉常蓋禮樂所自出有列其間則與聞稽古
制作之事他寺不可同年而語也爾強學好脩久率多
士俾造稷嗣盆觀所長

錢端禮參知政事兼權知樞密院事制

朕居域中之大以天下為公念立政之維艱孰稱前疑
之任儻量材而可倚難拘左戚之嫌書賛稽乎人情典

故存于國史具官某學該古訓名著清蹕憂時極饑渴

之思致主出忠嘉之蘊下王恢之議終始未嘗異同成

魏絳之功南北以之休息自登右府兼贊中臺見施置

之無私喜規撫之可久都俞契合猶伯牙之操遞鍾典

領雍容蓋庖丁則有餘刃其參國秉共立邦基仍尊惟

幄之籌匪專俎豆之事家聲不墜臣節甚休噫二百載

而中天欲顯祖宗之烈三十輻而共轂所資輔弼之良

勉奮爾庸以濟于治

虞允文同知樞密院事兼權參知政事制

朕仰承慈訓光紹慶基經武整軍莫重本兵之寄移風
易俗常懷修政之難時有異材助吾上治具官某學周
貫變識蘊經綸運堂上之奇兵方顯兼資之略掃舟中
之敵國遂成無競之功茲陟宥庭仍裨政路已見贊襄
之効庸知密勿之長離婁燭千里之隅物情難隱柳下
奮百世之上時望浸高宜副斗樞併參天緯所賴股肱
之助無復毫釐之差噫衆賢和於朝當法皐夔之迹一

相處乎內非專周召之權益展英規用隆華問

王剛中端明殿學士僉書樞密院事制

國家以得賢為重人臣以逢時為榮況登四近之班實
應三階之象惟邦之彥非朕可私具官某誠懼無華特
操不倚學有根柢而抗以高明之識言無枝葉而發為
典則之文附翼攀鱗蚤從容於宮邸捫參厯井獨振耀
於藩垣趨節召而復來聽履聲而可識虞夏之書渾渾
爾方推禁苑之長伊望之業凜凜乎宜陟壽帷之列所

資忠力同起治功噫尊俎可以折衝蓋茂明於上策股肱其惟執政無專美於前英往體至懷奚俟多訓

魏昂魏昌承信郎制

爾父盡忠報國死於行陣恩及存沒不一而足咸畀命秩勿墮家聲

胡昉直祕閣知盱眙軍制

邊城新遭戎馬之難勞來凋瘵必惟其人爾少長淮壖習知風俗寓直中祕超分郡符無輕一障之乘遂媿鴻

鴈之雅

魯嘗太常丞周舜元太府丞魯可封將作丞制
九寺三監之屬嘗合丞簿為一今還其舊所以開搜材
之路也嘗決科之久達於禮文舜元名卿之子習於財
賦可封學古而仕幹用有稱為官擇人分佐其長各思
盡忠無或負丞

唐輅大理司直制

獄人之司命也吏或巧心析律高下其手使無辜者遭

刑罰豈為民父母之意哉故選儒臣為司直所以申其枉也嘗思名官之旨則人無冤矣

龔滂國子正制

褒衣博帶之儒露其顙者咸集於膠庠表正之官未易居也爾博古知今鄉曲有譽力行所學用副選掄

祝閔利路運判徐人傑江西提舉常平制

部刺史握澄清之柄動搖山岳震懼州縣用匪其人下則受弊爾閔夙有吏材再任蜀道就持漕節以饒王師

所以省送往迎來之費也爾人傑儒林之老久列郎闈
俾陟倉臺以臨江右所以徇更迭補外之請也繩姦摘
伏思振六條寬我遠懷時爾之職

陳輝知廣州制

番禺為一都會象犀珠香之湊見者惑之貪泉之詩所
為作也遐萌焉於朝廷連率係其休戚必得文武威風
知大體者迺稱其選以爾老於宦途飾以儒術蘓枯鋤
強勇於去弊旌旗蓋海南伯甚尊畀爾重權用俟報政

思濟斯民以稱朕仁不異遠之意

竹友直循資制

日者宿衛置使大開莫府爾名在籍中厥有賞典進秩之榮國不失信

韓慤胄循資制

國家除戎器以藏武庫嘗下諸郡作甲爾能勤其官先期趣辦爰進一秩示信賞也

左迪功郎龔揔父紱封右承事郎制

朕以孝治天下推紫壇之澤于有官君子凡鮐背兒齒
之老有子列于仕籍者咸得而寵光之爾修身齊家旌
期稱道義方之訓著於鄉邨載增命秩以為爾桑榆之
榮

馬希言太府寺主簿制

有列于朝者搢紳之選况九寺之屬乎爾摠領工巧勞
於辦職司府勾稽肆以命汝往欽而長益勤其官

胡堅常直祕閣知盱眙軍制

盱眙新剏於兵數月之間郡將三易遴擇其人將以徠
流亡而通互市爾贊貳京邑咸謂有材召對便朝占對
可喜寓直藏室畀以虎符能振其職則吾無北顧之憂
矣

洪箴大理司直制

法家者流或用刑定罪安忍深刻失先王仁恕之意司
其直非儒者安歸乎爾名父之子額門擅業往踐其官
必能以古義決疑獄也

索震循資制

日者北鄙有釁慈宮視師江上凡扈從之吏無小大畢進其秩爾名在籍中宜受茲賞

李暉降官制

爾掌征商之事課損於常宜在大譴之域又訟其僚驗之無實并按爾罪欲不懲可乎奪官一等省我寬科

朱華孫降官制

爾為縣大夫吏有乞取之姦而懵不知覺緡錢會計差

舛豈無雀鼠之可疑也寧失不經姑用貶秩服我寬典
思蓋前愆

知贛州趙公稱復直祕閣制

朕慕西漢良吏之盛故信賞必罰循名責實祖述孝宣
之政爾頃坐小過失中秘之直既更大青而治聲達於
朕聽還爾舊物思所報焉

盤洲文集卷二十三

欽定四庫全書薈要卷一萬五千七百七十四

集部

盤洲文集卷二十四

宋 洪适 撰

外制六

張孝祥復集英殿修撰知靜江府制

炎嶠分疆八桂獨為善地有唐重外九牧多用詞人我
得良翰可寬遠慮以爾性識超詣學問紛綸抱昂霄聳
壑之材利斂矜淬鋒之器廣廷對策諸老生莫敢抗衡
兩禁代言他學士至於閣筆典股肱之劇郡掌管鑰於

留都治有能名庭無通事睠遐萌之未艾咨南伯而匪輕稍還論誤之班往重蕃宣之寄椎理或奸法令當去渠魁溜橐之在州閭盍新軌轍國須賢立吾不汝忘

李珂改官制

仕者滿六考有薦者五人然後脫身小選亦可謂難也已矣爾好學能文嘗見推擇便坐賜對詳整可采躋之王官非常典也思我恩渥有以稱之

劉芮湖北提點刑獄鄭丙湖南提舉常平制

部使者分耳目之寄職有劇易而澄清之權等耳爾芮
恬於勢利論議不阿爾丙材資敏明知民疾苦持節重
湖蓋未久也易地而處僉曰允哉或揔岸獄之柄或行
斂散之政使人無冤事無弊則惟爾之休

張訓通復官制

失律喪師罰難苟免青災肆赦澤所不遺爾久逮戎行
嘗靡敵壘治棄甲曳兵之罪已綰嚴誅推息黥補劓之
恩稍還舊秩勉圖後效用蓋前愆

魏彥轉官制

山越弄兵騷我嶺表爾控弦擐甲力掃妖鋒解圍擒敵
厥功茂焉爰陟榮階書之勇爵益圖忠報嗣有恩光

劉淑贈官制

爾氣吞羣盜履刃登鋒拳勇無前沒身流矢爰加祿典
併錄遺孤九泉有知服此恩渙

孫諒轉遥郡刺史制

羣盜蟻聚五嶺麇驚遠聞獻馘之音可後踰時之賞爾

精忠自奮沉勇無前獨提虓虎之師遂清狡兔之窟畀
之州紱夸爾戎旃當令黃木之灣不見綠林之迹益思
功效嗣有恩褒

吳掾轉五官太府寺丞制

太府掌貢賦之貳而班貨賄於受藏之府蓋周之舊官
也爾材器莊粹佩服義方萬里侍行西平有子俾丞九
寺仍陟五階用增濟美之休且示褒忠之眷往涉其筆
以對恩光

吳柄轉五官直秘閣賜紫章服制

朕注意元戎遠馳名節晉晝三接未盡褒賞之意爾教
忠有訓稱其家兒躡進文階俾直中祕仍錫金章之寵
式增綵服之光

周夢若母許氏封孺人制

朕跋祀紫宮推澤遐邇影纓仕路者其親九秩則有圭
組之榮與夫湯沐之邑所以教天下之孝也爾壺範之
賢擇鄰有訓龐然華髮逢此恩榮用增三釜之歡以彰

四德之報

莫延廕承信郎制

爾棄其故土慕義來歸載嘉忠忱宜有褒異俾躋仕版
用示恩榮

彭昇貴州刺史制

右列以遙郡為榮非異恩不能到也爾嘗扈慈殿積有
勤勞寵之州旗宜思忠報

王淪浙西提點刑獄實敷潼川運副制

坤維吾西土也距朝廷且萬里吳中吾駐蹕之所也外
臺去天纔尺五朕視其地如戶庭視其人之休戚如一
身未嘗有遠邇之間分道置使厥選匪輕爾淪嘗持閔
節有澄清之譽茲用命爾察刑于近畿爾敷嘗典蜀郡
有平易之政茲用命爾轉漕於舊壤能使民不寃用不
乏官不媮吏不蠹則爾之職舉也

薛鳳國子正季翔太學錄制

士不遠千里而來使其漸摩道義循服規矩則表儀之

列可非其人乎爾鳳爾翔儒之秀俊其推正心誠意之學以助我長育之教

魏吉甫大理寺評事制

孔門高弟片言可以折獄周書有訓兩造然後聽辭爾詳練法令宜列理官欽哉欽哉毋寧上下其手

凌景夏復敷文閣直學士制

朕禮神頌祇已用上辛之吉滌瑕蕩垢率循令甲之常惟時從臣未獲舊貫爰推茂渥實采僉辭具官某識遽

經郭量函德宇出入久乎中外聲名著宇邇遐重鎮撞
牙遏邊衝於樽俎清蹕聽履振公道於銓衡頃出多言
退休閒館茲廣奉壇之澤俾還內閣之班往服綸恩以
需節召

資政殿學士湖南安撫使黃祖舜轉一官致仕
制

輕裘制閫遠馳耳轟之聲方幅叩閭遂露抽簪之請勉
從雅志用出褒書具官某識洞眇綿量苞廣博糟粕不

膠於紙上經綸自得於胃中有嘉憂國之誠屢納庇民
之說榮躋樞極陳泰階六符之經任重藩垣修方伯連
率之職正仰折衝之效遽高知止之風眷此老成閔勞
以事增之品秩式寵其歸往佚鄉枌盃迎壽祉

李如岡磨勘制

三年而計羣吏若稽陟典之文繫日不離小官獨減從
臣之闕茲協銓曹之法實彰名器之公具官某識探道
原智優闕具司刑禁路鞠茂草於園扉敷惠藩方美甘

崇於南國奉叢祠而通志增華秩而應條往服恩綸益
休廣譽

梁俊彥轉遥郡刺史制

朕患陟典之濫或有以更制其法自貴近始所以奉三
無私也爾蚤齒闕文史典司宮維能勤其官環

列序進訓齊闕

紱之榮與錫類等益思忠恪以對

光寵

周葵封宜興縣子制

朕嗣守洪基肇禋紫時當路寢齋居之夕霏雪甚繁暨
闕宮朝獻之辰陰雲盡解克竣熙事爰布慶條若時舊
德之臣宜出明綸之命具官某深忠許國遺直事君非
堯舜之道不陳同熙庶績殆管晏之佐弗及咸仰貴名
屬三歲之親祠值四郊之多壘建改卜之議能稽皇祀
之成規迓消成之休遂展太元之大報會有燕間之請
莫陪顯相之儀茲舉典章用開爵邑噫致齊侯之昨有
考舊聞受宣室之釐敢懷專鄉益綏善履用對恩表

王之望封襄陽縣子制

朕遵舊規於

闕

變熙事於一陽啟蟄而郊協魯國

駢犧之祀獲獸以饋若漢代白麟之章既歲上儀用推
慶澤具官某忠規致主壯志絕人闕紫闥而攀台階榮
登五列穆天綽而經國體密贊萬幾緬惟消選之辰實
參枚卜之議偶休閒館莫相明裡茲䟽穀璧之封乃荒
菜食之邑噫百神咸秩已格嘉虞之休萬福來同敢懷
專鄉之意更綏吉祉以對恩輝

黃祖舜贈五官制

錄賢褒德稽載

闕

崇終存有邦之典令若時

俊望嘗列清班方覽挂冠之章忍聞易箦之語告其居
第出此卹書具官某器局沉深風規直諒傳孔孟聖賢
之學入淵騫德行之科卿佐是謂股肱久運中樞之畫
俎豆嘗聞軍旅爰分方面之權羽淵忽夢夫黃能長沙
果集乎止鵬命之不淑識者咸嗟用增幽壤之榮嗇進
文階之品尚其不泯歆此猶生

劉立等轉官制

爾等頃以軍興奔走郵置宜推賞澤用獎勞勤

高郵軍立功人轉官制

淮瀆之役氛祲盤結爾等或被甲戰野或銜枚攻營第
賞褒功咸進階秩益思忠力以對恩榮

權洮州趙令結妻包氏封令人制

爾夫身留異域而王師薄於城下爾能率軍民望風歸
義忠壯如是女史所無宜錫令名以開脂澤使妾男子

知所媿焉

楊貴等轉官制

西陲受敵百將同功爾賈勇奮忠斬首捕虜幕府差次
宜陟榮階往服恩光益圖報塞

吳益轉右朝奉郎制

朕惕奉慈謀光臨寶祚嘗覃中外之慶靡分大小之臣
具官某接物惠和宅心端栗披尋竹帛知師友之淵源
怡養丘樊玩煙雲之舒卷頃階戚黨蚤綴從班獲逢嗣

服之恩實應遷官之典益思謙畏用保寵榮

薛良朋進職制

人主以八柄馭羣臣予奪廢置猶雨露雪霜不可以偏廢也二浙歲惡不入民多菜色朕隱憫流徙食不甘味故坐視不恤如嘉如康祖如宥之者則紬之奉使稱職如嘗如闕者則陟之爾奉行不懈賑拯有勞顧不賞可乎進直河南尚勉之哉

姜詵進職制

朕哀凶歲之民軫殍野之慮救留之策靡不施行王城之外流亡四集今既數月矣幸而生存則可以返其田廬有司勞於賑恤者以次取賞寧過於厚所以勸勤事之吏庶幾乎廣我仁民之心也爾閱視賙委不懈厥職道山之選時謂優恩益思其終以稱羣論

韓彥古轉官制

日者聚饑民于四郊分官吏廩餼鬻致醫藥爾攝承民曹實參其事今生者可歸第勞論賞增秩一等以勸後

之濟斯民者

吳拔駕部郎官制

卽位上應乾文為朝廷華轍爾有列卿寺訓墨未乾躋之司輿時謂異渥所以彰乃父教忠之訓也惟爾行安而節和必能恪居厥官以稱朕意

閻安中中書舍人制

朕考三代以來在兩京最盛文章煥焉可述莫非爾雅之辭號令罔有不臧初無替否之迹追還古始有待髦

英具官某學闡丘墳聲諧韶濩決科文陞切直冠夫諸
儒掌典儀曹光燄超乎儕輩介然有守卓爾不羣自入
賢關維新學法挾策負素者爭親乎模範躡纓逾等者
咸就乎規繩惟禁路之擇材輟師資而為誥雖出綸出
綍欲求潤色之工為紀為綱尤賴論思之助往踐厥次
時維休哉

趙伯強承信郎制

爾父蒙盾援旌殞於行陣錄孤之澤所不可遺往即官

聯式思所報

葉顥磨勘制

八柄詔王厥分爵祿之等三載考績率循法令之常雖
列從班必遵彛矩具官某賦材碩大迪德忱恂蚤環轍
於官岐晚垂紳於仕路秋官斷獄議者謂過于張文部
曲銓衡時號復同于盧李茲因會課實應遷階庸出絲
綸之褒庶增筆索之重往祇寵渥益廣休聲

劉儀鳳磨勘制

設六卿之官是為邇列考三載之績蓋踵前規若時禁
密之臣亦限吏銓之格具官某淵源種學典雅摛詞自
揮翰于南宮即主盟於北戶司馬掌九伐之法厥有弛
張太史成一家之言正資筆削茲因會課實應遷階初
非不次之恩庸示無私之典往祇茂命益暢美聲

吳璘判興元府制

漢中巨屏實蔽極邊關外重權毋踰元老出茲言綍新
彼轅門具官某名

關

武立凜凜中堅之望番

番上將之元建方畧於函谷以西稍寬遠顧逞雄心
於狼望之北獨蘊壯懷茲載戢於師干庸近移於幕府
九命作伯孰先倚愛之親十國為連益賴扞城之助副
吾注意知汝匪躬往究英猷奚煩多訓

王大寶禮部尚書制

朕遠覽周書尚猷詢茲黃髮若稽虞典疇咨汝作秩宗
復起老臣甚諧輿誦具官某抗高明之識馳魁壘之名
紫橐崢嶸孰並驅于禁路皂囊剴切殆獨步於諫垣雅

操不移高風易退方奉祠而均逸忽上牘以遺榮緬懷
骨鯁之英浸勞夢寐之想遠移一節既無俟駕之淹載
錫魚金寧有挂冠之執爰蔽朕志俾長春官益進德以
尊朝期用儒而益國討論禮樂豈止玉帛鐘鼓之云獻
納箴規庶幾几杖盤盂之戒往祇厥位惟爾之休

方滋權刑部侍郎制

朕俯酌人情若稽禁罔前之所是著為律具存畫一之
章爾曰勿宥惟厥中斯躋登三之政比申細札用戒祥

刑疇咨明恕之才俾摠平廷之柄具官某溫沉深之識
擅盤錯之能使節川麾殆艱難之歷試民風吏蠹無纖
介之可欺輿議皆稱其賢三紀久勞于外宜持紫橐遂
貳秋官夫法令譬猶江河蓋易避難犯之義若文書盈
於几閣有奇請他比之奸已局鐫乎兩端唯科條於三
尺其推朕意毋忽獄疑竚而稱職之休成我知人之哲

王承祖等轉官制

爾遠隨戎莫來造帝庭用陟官聯以示還歸之寵

唐閱國子司業制

古之君子經為人師行為人表故居一鄉則一鄉化在一國則一國治今朕羅天下秀異于成均侈袂方履閭閻秩秩不但取其庠聲序音之盛為美觀蓋欲養材器備官使也以爾擅顓門之學高月旦之評入朝十年恬於執利彌邵之德稱為醇儒比因使指之還嘗賜清閒之款占奏詳整簡在朕心往誨諸生思稱其職

王弗權戶部侍郎制

朕若稽仁祖嘗用許元雖增秩遷階至列賢科之籍而
歷年玩歲不離財計之官蓋久其任而得人則盡其才
而興利今朕此選將庶幾焉具官某智慮縱橫材資超
詣歷宦岐而甚久惟心筭之最優通知食貨之源灼見
公私之弊對之所陞嘉富國之謀猷試以版曹有裕民
之方略其額治賦之柄勿分約法之勞要當解瑟而變
更無或守株而苟且從班足可施設非錐處囊中之時
國用賴以贏餘貯錢流地上之效往追前哲嗣有褒章

鄭立政官臨安府知縣差遣制

賜對于昕朝易階于小選雖典章所有而恩不常出也
爾粹於學問稱有吏材敷奏可嘉不誤舉者畿內壯縣
用試爾能政績有成嗣將飾擢

韓彥古直徽猷閣知嚴州制

爾攝承省戶以語言之失罹於清議自詭治民吾以乃
父勲藏盟府不汝疵瑕延閣汝舊物也嚴陵吾輔郡也
夫美錦尚不可使人學製况千里之寄乎爾其矯揉脩

飭允蹈中庸使實惠洽于編氓則爵位可以長守敬之
哉毋荒棄朕命

盤洲文集卷二十四